

# Michael Bauer



Faschd iwawiegend lyrische Texte uf Vännemärisch

siehe <http://de.wikipedia.org/wiki/Kurpfälzisch>

### elktroBuch im Eigenbau Viernheim 2010

Dieses elktroBuch darf frei von der Website

<http://elektrobuch.mikelbower.de/> zum privaten Lese- und Vorlese- Gebrauch  
heruntergeladen und unverändert weitergegeben werden.

Alle weiteren Verwertungsrechte verbleiben beim Autor.

***Michael -mikel- Bauer*** (\* 1952)

lebt in Viernheim / Hessen

arbeitet in Weinheim / Bergstraße

mehr auf <http://mikelbower.de>

# Inhaltsverzeichnis

Kuldua ausm Beidl.....	6
Alsemol äh Leid.....	7
Alla Yeah.....	8
Häschde, Migge?.....	9
Kundsched.....	10
Olwl.....	11
Schdordz Bäsch.....	12
Sexobjekt.....	13
Sunneschinge.....	14
Weje nix.....	15
De Himml, Geige un die Erd.....	16
Elwetritsche un Nachdgrabbe.....	17
Zwee Daag long.....	18
Pegglscha.....	19
Moie geids wia hoppsassa.....	20
Un doch wäds Summa.....	21
Was geid blous in de Aache voar?.....	22
Den Buggl.....	23
Schdrousaggwalza.....	24
Isch hebb de Pazifik abschdaabd.....	25
Isch hebb moi Hitz.....	26
Mädzevailscha.....	27
Was is des blous fa e Lond.....	28
Besser Welt.....	29
Voggl Gepeif.....	30
Iwwasetzung.....	31
Machs nochemol.....	32
flagge lischda un e hymne.....	33
Woanns sou schee war.....	34
De Himml volla Geige.....	35
Schdenscha in moim Houf.....	36
Nochschbiel.....	37
moin senf.....	38
s'rabbld.....	39
Geldschisser.....	40
E Schoann.....	41
Bruschdwaaze.....	42
Du hoschd geblinzl.....	43
Schlierefahrn.....	44
De liewe Godd hod Huschde.....	45
Moin Scherem is zu long.....	46
Iwwa de Wolge.....	47
Gedonge im Wind.....	48
Aldi Hex.....	49
Esoterik.....	50
Grille.....	51

Peife.....	52
Himmls Urlaub.....	53
Linje in moinare Hond.....	54
Devu laafe.....	55
Schdännscha.....	56
Zwelfe Middaags.....	57
Haisl.....	58
Zugeblaschdad.....	59
Iwwasetza.....	60
Petze.....	61
Glinnan.....	62
Summa is wire mol.....	63
Hoamwei.....	64
Roude Sogge.....	65
Ach Du.....	66
Alla hopp, Mehmet.....	67
Geglizza.....	68
Drinnedraus.....	69
Moannema Ferz.....	70
Käähn, nix als käähn.....	71
Schdännscha.....	72
feischd.....	73
Die do owwe.....	74
G'schischte aus'm Keffadala Wald.....	75
Kinna, Kinna.....	76
Summa.....	78
sella schdern from us.....	79
woann die Grabbe wia kreische.....	80
wädä uf die haut.....	81
vadiefung.....	82
image.....	83
wieviel schdrosse.....	84
Training.....	85
Kersch.....	86
wu zum deifl.....	87
im schubbe.....	88
im kaffeehaus.....	89
hinna de wolge.....	90
lideradurkombedenz.....	91
aliens.....	92
gudi bessarung.....	93
marinierti seel.....	94
isch hebb de himml geakaafd.....	95
wahl.....	96
isch wä jo aa gään.....	97
profis.....	98
vagelts gott.....	99
was sunscht ?.....	100

s' werd Herbschd.....	101
Zweidkopp.....	102
Alle via Woche.....	103
Hedd ä aa sou e EnglBloog ?.....	104
Leischd un feddfrei.....	105
Äh Leid Äh Kinna.....	106
Was geischdisches braucht ma.....	107
Vielleischt is die Weld unna goange,.....	108
Scheissttechnik.....	109
Redde den Schdondard - Dialeggd.....	110
Nix Neies.....	111
Liewa Godd, moin liewa.....	112
Losst uns Kathedrale kaafe.....	113
Haud aus Dräne.....	114
Fusionian.....	115
Touristefluch.....	116
Die Zeid is ford geloffe.....	117
Die Dummschwedza gehn um.....	118
schweewe, schatz schweewe.....	119
Im Leewe net.....	120

## **Kuldua ausm Beidl**

Uns is die Kuldua ausgonge. „Tschuldigung, heede Sie mol noch e bissl fa misch in ääm Baidl ? Wisse' se sou gonz uhne isses jo aa nix. Schundscht hewwisch imma e bissl in Reserve, sogar in Zweid-Beidl hewwe ma fa die Kinna. Awwa ausgreschnd zu de Kuldurwoch is nix me drinn, de Beidl is lää. Donge, noo souviel brauche ma net. Noja, kimmts halt in de Beidl. Negschd Joar is a wia e Woch.

## **Alsemol äh Leid**

Uff moim Dach  
treiwe Feddan  
vun zwee Engl.  
Uzischdisch flije die  
sisch imma noch lieb.  
Im Himml gibts  
koa Palz  
kreische se vun  
de Kerschebeem.  
Mä hewwe Feddan  
gelosst jubilian  
sie in ähm Gloria,  
naggisch mole se  
kloane Pimmlscha  
in de Schouß  
vun selle Engelscha  
in dere Jesuitekersch

*Dieses Gedicht wurde 3. beim 55. Pfälzer Mundartdichter Wettstreit in Bockenheim 2007*

## Alla Yeah

In de Schlong vorm Fraueklo  
bei de Schdouns im Eisstadion  
driwwe in Monnem, babblt se pelzisch,  
wie in Heidelberg finf Meda hinnam Hodschimin,  
Blumme ins Hoar gschdeggd,  
roura Mohn un Kornblume vum Feld.  
Fa was heian, schdebbln kann ma aa sou,  
hod se gegrische un is fod.  
Ach Kinna wie die Zeid vageid.  
Wars ned schee achdeseschzisch im Mai?  
Seschzisch bin isch heid, ja un?  
Dokda rer pol un zei Bischa gschriwwe,  
zung ma in Kuss wie selles mol,  
lieb misch wie Riesling im Dubbesglas,  
bischbad se, wia dehom im Winzazeld  
alla yeah, alla yeah, alla yeah.



## Häschde, Migg?

Uff die Vāzisch zu  
un imma noch  
koa Kinna  
wonda moand  
isch geeb de Oba  
wonn isch mol  
iwaa de achzisch bin  
hedda Eisch gschnidde.  
Liewa mach isch  
selwa noch e Paa  
jo, isch hä jo  
jo, isch hä jo  
jo, isch hä jo  
schun uf sou  
oazugewwe  
Erna, jo.  
Hääda uf zu lache,  
sagglzement!  
Däm däm dä dä  
dä dä dä dādä dämm dä  
Sädifagschen  
noch e mol.

## **Kundscht**

Drei Oama Kundscht  
leer isch iwwa  
des Seegmehl  
vun de Beem  
wu se misch vawischd hewwe  
mid de Kreissäg

## **Olwl**

Wonn isch denn Olwl vawisch, dem isch uff die Fieß gedabbd  
bin un dä wu sich dodriwwa hot net entschuldische losse!  
Wonn isch denn Olwl wie vawisch, dem dred isch nemme uff  
die Fieß, bloußdassdass wissd. Alla donn.

## Schdordz Bäsch

Ma keend moane, mä wään all souuu dreggisch, dass uns de Himml endlich mol dusche meesd. Sou hots runna gemacht heit moied. Also, keend ää eisch dodemid net noch e bissl beherrsche bis in de Ogdowa. Orra? Net? Alla Gut.

## Sexobjekt

Heit moied hewwisch'ere Humml zugeguggd, wie se inneme Klatschmohn rumgegrawwd und gflohe is, weje denen paa Groamm Bliedeschdaab un dodebei noch als Sexobjekt missbraucht woan is vun sellere Blum. Hewwischma gedengd: Sou meegd isch ned schaffe misse! Un waas wia emool in Daag long zufriedere. Alla doann.

## Sunneshinge

Mä wä mol wia noch Sunneschinge mid Reiesooß. Gegroinde Zwiwwl dezu oa Mass, un e gonzi Nachd durchgebabld om Kischedisch. Awwa noch de Zeihne falle ma halt liewa die Aache zu. Droam hinnahä, hei ä solld net sou schnell fliehje, dschuligung, jezad sin die Trääm schun wia bei dä gelond. Kummd hä, ä Seggl, mä gehn wia. Was, no? Alla donn.

## **Weje nix**

Heit waa isch innere Kersch e Kerz oaschdegge. Weje nix. Oafach sou. Isch hebb ma vogschdelld, wie se vor sisch hie bruzzld, longsam vaschmilzd un dass ISCH den Dregg net weg-mache muss. Des waa mas wäd, alla doann.

## **De Himml, Geige un die Erd.**

Was bin isch frouh, dass isch heid e bissl down bin. Schdell  
eisch emol vo, wie des wää, wonn de Himml werglisch volla  
Geige henge deed. No, wäds ball, isses eisch endlich ufgfalle,  
eisch Deedl? Des is doch sunneklar: Allweil de Härnscheedl  
oawesche deede ma. Un des wä sou schee, des solls soi? Alla  
denn.



## Elwetrutsche un Nachgrabbe

Die Elwetrutsche knutsche die Nachtgrabbe heit Nacht. Jo, das das aa glaabd und guud schloofd heid Nachd. Sis hald sou im Mai, wonn die Elwedridsche die Nachgrabbe knudsche. Alla donn, was widd'n mid doine schdaawische Wolperdinger, Du bayrischer Preiss. Die Elwetritschl knutsche die Nachtgrabbe heit Nacht.

## Zwee Daag long

Zwee Daag long  
vaschdeggln ma uns all  
Koan Reborter, koa Bolizei  
koan Bolitiga soll uns sehn.  
Zwaa Daag long  
gibts koa Volg.  
Monschde die deede  
sowas merge?  
Isch glaabs net!  
Alla bis doann.

## Pegglscha

Hoschde mol e Peggl  
gebrauchdes Flugzeigbezin,  
abgebrochene Eis-Schdange  
vun letsch Joar,  
vabrauchdi Raachalufd,  
urasierdi Fasnachdsschdimmung,  
abgenodelde Fischde-Äschd  
fa misch?  
Hoschde net  
alla guud!

## **Moie geids wia hoppsassa**

Un moie geits wia  
hoppsa sa  
dalli dalli  
mä sin schun doo  
moie erschd  
un haid is haid

## **Un doch wäds Summa**

Die Elwetrutsche  
fliehe zu de Wolperdinger  
kreische uf de Egga rum  
un doch wäds Summa  
glaabd mas  
mee als da vielleischd dengd

## Was geid blous in de Aache voar?

Moi Braue runzln  
bis die Iris lachd  
und kreischt  
hä uff, was meschdn wia  
mid mä

## **Den Buggl**

den pagge ma aa noch  
awwa beim neggschde  
bleiwisch owwe mol schdeen  
und gugg wu ma hielaafe  
moi Ziel liegd neemlich  
oam Weg  
den Buggl noch  
un koana meh

## Schdrousaggwalza

Isch donz je zad glei de Schdrousaggwalza, oans, zwaa, drei un Aache zu. Droam debei. De Schdrousaggwalza doubd dursch moin Droam. Isch donz mit dä in moim Schdrosaggwalza: Oanz zwaa, drei, runderum un iwwazwersch. Isch donz mit dä, alla donn.



## Isch hebb de Pazifik abgeschdaabd

Isch hebb de gonze Daag heit gebraucht, biss dä Scheisspazifik abgeschdaabd wa. Isch entschuldisch misch fa des hadde Wodd Pazifik. Imma die Welle und Schaumkrone, bis ma do de Schdaab hunne hodd, dä held jo net, schun gaa ned schdill.

Mä keend moane s'deed Schbass mache Windhouse oazuziehe. Awwa demm hewwisch gewwe fa's Knorre. Doad wu de maischde Schdaab is, sou korz vo de Ouschdainsln, hewwisch net abgeschdaabd, hebb oafach e Deggsche driwwa gschdriggt. Sieht gud aus, woann die bunde Fischscha drunna ewegg swimme. Sou, jezad. Moie mach isch mit de Hummer un all de oannan Haie e Wormkur un donn is gut. Kimmt wia de Atlantische droa, isch meeg gar ned wisse, wie dä wia aussiehd. S' gibd viel zu duun, all doann!

## Isch hebb moi Hitz

oigfroan  
va de neggschde Winda  
orra Moie, wä waas  
schun was.

## **Mädzevailscha**

Des Joar robb isch koa  
Mädzevailscha.  
Isch zeig se da uf de Wiess  
Schad dass de Borrem sou kald is  
noch sou kald is wie Du un isch.

## **Was is des blous fa e Lond**

Was is des blous fa e Lond, wu moieds um halwa siewene schun die Sunn schoint? Do machese nix dro, nix. Alle Johr 'selwe, awwa ennan dud sisch nix. Va onnan Ferz hewwe se Geld, awwa dodevor? Isch wä hald weida im Helle schaffe gehn misse. Alladonn.

## **Besser Welt**

Jedzt hewwisch die Weld om Bauch gekitzlt und leg misch uf de Buggl, guck on die Degg und denk ma e besseri aus. Des koschd nix, wäd nie longweilisch und held misch bei Laune. Macht ää aa sou? Alla doann.

## Voggl Gepeif

S' deed jo graad noch fehle, das oana dauand in Reieboe on den blaue Himml mole deed. Is des net furschdbar, alle Joar des Ge-dees mim Friebling un daß die Blärra wachse? Ah jo, des mache se doch alle Joar, orra? Sachd emol, geit eisch des Vogglgepiff net aa uf de Wegga? Eigendlich g'felt ma des jo alles aa sou guud, ählich, sou guud, awwa des Johr heed isch's noch gään zwee drei Woche länger kalt un owends frieha dungl kat. Awwa des gibt sisch, gell? Alla donn.

## Iwwasetzung

Hoffendlich koann isch schloofe heid nachd, ischhebb nem-  
lich e Problem: Wie keend man geil un cool uf Vänemarisch  
iwwasetze?

## Machs nochemol

In moim negschde Leewe schreiwisch ma e Programmierschboch uf vännemarisich.

Des keend doan sou haase:

Hää, mache mol die Dadei do uf, selli wu "doc" druff schdeid. Und doann meschde enunna, bis de uf de Borrem kimscht, loss schleife, Biewl. Un jezat awwa ab uf de Bildschirm demit, hoshde kääd, loss die House waggln!



## flagge lischda un e hymne

driwwe iwwa de autobohn  
funzl wia die lischda  
in sellen houchhaiser  
wu koana meh vännermarisch  
koann un die aldidudde  
die neie flagge sin  
gar netemol sou schleschd  
isch wärrene e hymne schreiw  
woaan se wia gehisst wäd die flagg

## **Woanns sou schee war**

Woanns am scheenschde is, donn gei noch long net hoam,  
s'kehnt noch viel scheena wän, wonn die erschdemol dehoam  
wän, wu gonge sin, weils sou schee wa.

## De Himml volla Geige

No ja, in Himml volla gebrauchta Gaige keend ma schun vandraache haid. Neie kann jo koana bezahle, selbschd de Aldi traut sich do ned droa. Was? Was seschdedo: "Gei ford, mit dem Gebabbl?". Isch froch Disch: „Hot de Aldi schunne mol in Himml volla Geige im Oagebot g'hatte, horra, hä?“ No, äh hot net, noch nie, noch neddemol sou Geige va dehoamrum. Nie. Koana hot schunnemol Geige im Oagebod ghadde. Schun komisch, gell? Wu'se doch oadauernd im Himmel henge. Net? Alla gut, bei däa velleischt, bei mä schun.

## Schdenscha in moim Houf

Woann die blous mol uffhän keende äh Schdenscha bei mä in de Houf zu schmeisse. Medeoride wään des, hot de Karl gsaad, is mä egal, was des is. Uffhän solle mit sellene Ferz. Isch muss doch doan dauernd die Gass kährn. Irgendsou es Sau schmeissd dauernd mit Schdänsch noch mä un doann muss sich noch de Dregg wegmache. Noa Donge, was soll doan do romondisch soi?

## Nochschiel

s'Herz bobbad noch in de Fingakubbe  
alles ist weisch, aa die Finger und die Händ  
drowwe uffem houche Berg  
wu ma eewe noch waan  
kreische unsa Seelscha imma noch und lache  
do hunne laije zwee drobbe Gligg  
und donze

## **moin senf**

geit niemand ebbes oa  
moin senf gebb isch nedd hä  
in moin senf schdeggd net jada soi werschdl

*Dieses Gedicht wurde auch im „Hierzuland“ Heft 41 abgedruckt*

## **s'rabbld**

Moi Narreschelle rabbln iwwamoie um sou laura, donn woann äh schun lengschd vagesse hedd, dass da drei Daag long eisch die Narrekabb oigebild hedd. Narr soi iss e hardi Erwed, s'gonze Joar long, seschd Du? Was fa in Kokolores. Isch bin des logga vum Hogga alle Daag dreimol. In Narr. Awwa mit de Schelle rabbln du isch blouss woan isch die Kabb wexln will. S'Rabbl rabbl, alla Gut.

## Geldschisser

Isch hebb endlich in Geldschisser im freie Feld gsehn. Awwa als isch e gscheides Gschbräsch mirrem hebb oafange wolle, hodda gemergt, dass isch'n foange will. Uff un devu wara. Jezad scheissda soi Geld hald wu oannaschda, wie schundscht schun imma. Solla doch, was brausch isch vaschissenes Geld, orra? Groine keend ma, groine, wonn ma ned dauernd lache meesd. Alla donn.



## **E Schoann**

Isses net e Schoann, dass isch heid nix zum Schenne hebb? E Uvascheemdheid is des, jawoll. Nix zu meggan, nix zum kreische, alles im griene Bereisch. Isch hebb sogar zwee mol gelachd. Woann des sou weidergeid wä isch zum Dogda misse. Sou geit des ned weida, bezahl isch hald die zei Euro. Bisdoanemol. Gell!

## Bruschwaaze

Monschmol froch isch misch, warum zum Deifl aa die Menna Bruschaaze hewwe. Intressand, gell? Orra, warum mä zwee Hode hewwe, heeds oana ned aa gedun? Is doann alles dodruf ausgeleggd, dass die wischdische Sache dobbeld do sin? Was hewwe die do owwe, orra wä aa imma do zuschennisch is, mit mä vor? Sou als Ersadz vor was? Bruschaaze, mä dengd eigentlisch viel zu wennisch. Alla guud, mä dengt sisch, gell?

## Du hoschd geblinzlt

un e Schnuud gezoe  
s' heed a in Kuss soi kenne  
in die Lufd gschmadzd  
Ja was is donn jezd  
alla gud  
du hoschd geblinzlt  
un schunschd nix

## Schlierefahrn

E bissl Schlierefahrn heed ma jo doch gut gedun, awwa's soll halt net soi. Imma wonn Schnei leigd hewwisch grad koa Luschd, s'is jo donn aa immer sou kald drauss un woann ISCH donnemol Lusch heed, ja doann is koa Schnei meh do. Alla gut, des wäärs fa diss Joar. Kumma koana, isch soll in die Alwe fahrn, wu all die Apréla sisch die Schipäss um die Ohrn klobbe, des isses jo schun gar net, gell?

## **De lieve Godd hod Huschde**

Ach Gottsche, ach Gott, war des e Theader. De lieve Godd hodd Huschde ghadd un uns all zommegechisse. Mä wän Schuld, weil ma imma alle Dään uflosse dede un die Fenschda, die Windows haldas un koana meh gscheid bede keend. Also isch konns eisch blous flischdan, s'is e Kronkheit, wonn die Gedda kronk sin. Isch kann Eisch saache.....Was, iss gar net woar? Alla gut.

## **Moin Scherem is zu long.**

Monschmol is ma moin Scherem zu long, moi Fußdabbe zu grouß, isch bass kilomedaweid nemme in moi Hosse noi, awwa blous monschemol. Donn nämlisch wie is ma alles zu kloa, am meischde moi Haud, donn schboandse und isch deed aom libschde blatze. Sis schun komisch, orra?

## Iwwa de Wolge

Iwwa de Wolge driwwa weggsd dem Moann vum Mond soin Fußpilz un wonna sich zwische de Zeie poudld, donn reiads alles Schleschte vum Himml. Älisch, des hot de gehoimschde Gehhoimdienschd ausbaldowerd un dem SiAiEi gschdeggd. Die Owaaschlawiener vun de Regierung und Kersch hewwe des seit Joarn vahoamlischd, seit Joarn, sach isch Eisch äh liewe Leid. Awwa jezad wisse mas jo. Un aa, warum se dord uf de Butz haache wolle. Dä owwadabbische Krieg geje all die beise Buwe hod donn e End, wie die beise Buwe all aa, wonns nix Schleschdes meeh reiad. Awwa, wi zum Deifelbringd ma den Monn vum Mond dezu, soi Fieß efda zu wesche? De Misda President und die Gehoime Schlabbhied wenss schunn wisse, gell? Alla donn.

## Gedonge im Wind

Isch hebb moi Gedonge e bissl in dem  
Dreckswedda gewelzd, dursch de Reije gezohe, im Schdurm ge-  
driggld un donn miejene die Grasabfahrd vun de AutoBahn-  
brigg enuna gerast, denne drei Schneiflogge entlong.  
Dengschde, die gewwe Ruh? Als nochemol wolle se enaus und  
rum un dumm. Isch hebb'n frei gewwe die gonz Nachd. Solle se  
alloa dursch de Middlgong vun de alt Kersch renne, orra im  
Zentrum drauss rum mache. Isch bin in alde Moann un bin  
mied, isch gei in moi Bedd, was intressiern misch do moi Ge-  
donge. Halt, Du net, Du bleibst do, mä scheemd sich jo.....



## **Aldi Hex**

Isch heb e Koppduch ufg'hoggd un bin demid in de Fasnacht rumgerennt. Wie e aldi Hex. Awwa varods niemand, sunschd wolle se misch via emol vabrenne. Desmol weje dem Koppduch.

## Esoterik

Hinna de Hegge hogge wia emol  
die nochgemachde Elfe un zogge  
Elf! Ärja Disch iwwa die Dogda  
un bhalte ähn goldische Staab  
fa sisch, s'waan eschde dismol  
wow, elfmol die Elf

## Grille

Isch sehs kumme, bal wolle sie wie grille. S'is noch nette mol März un die Veggl peife grademol sou; donn wolle se glei wie grille un laudi Mussig in die Weld greische, ach Gott die wärn doch net oan Fasnachd grille wolle? Konn ma oan Mensch saache, warum die frieher dauernd mit "er huldigte seiner Grille" orra sou rumdedönt hewwe? Isch moan jo aa garnet, wie ma Fleisch essbar meschd orra Gemies, isch mon aa des Gedeens ums Grille. Grille un Witzisckheit als Oawendinhalt un net als Hinnagrund, wie sischs's eigendlich g'hään deed. Aa koa Idee? Alla donn.

## Peife

Holzpalette aus Plasdig  
gibts jetzad un  
fälschungssichere Bucheggan  
un in Wald fa jedn  
dassa peife koann

## Himmls Urlaub

Hewwe sie ah in Urlaub im Himml gebucht? Tonde Erika war schunn dort. Des hoddere gut gfalle, s'geeb sogar als Jägerschitzl mit Pommfritz und Salad. Blous die Erzengl wään e bissl daab. Imma sou iwwazwersch und wollde alle finf Minudde was geisdisches vakinde. Schunschd wä awwa alles schee dusmo. Sogar de liewe Godd deed net beim Middagsschleefl schdään. S'wään awwa viel zu wenisch Männa do drowwe in Urlaub, vun de Seli-sche hot ma jo sou körperlich nix, hot se gsaat und die Libbe nochgezooje. Ja und seitdem iwwaleggd sich de Couseng Erwin aa sou in Urlaub zu mache. Im Himml, mime haufe Weiwa, Jägaschnitzl un ugschärde Middagsschlof, des wä doch was. Fa Sie net aa? Alla, bis donn im Himml, awwa blous uf Urlaub, gell?

## Linje in moinare Hond

Isch hebb ma jetzt intensiv die Linje in moinare linge Hond oa-geguggt. Jezd bin isch schun sou long uf de Weld un koann imma noch net saache, was dord schdeid. Konn des soi, dass do gaa nix schdeid, dass dä wu des gemachd hodd, noa, isch schreib ned de liewe Good, aaa woan de doi Blus noch waida uffmeschd, alla Schbass beiseid, dä wu des gemachd hod, aa net gewisst hot, wassa do meschd? Kimmd ma grad sou voor. Ählisch. Awwa, Sakramend noch emol, wä hodd donn eigendlich g'saad, dass do ebbes schdehn deed? Dabbisch Zeig alles, wie waa des, mim liewe Godd un sellere Blus? Isch soll onn was oanneres denge un Ruh gewwe. Awwa donn, gell, alla Gud.

## Devu laafe

Ma keent uf un devu laafe. Alleweil ziehe se da's Geld aus de Dasche, spesche da ins

G'sischt und donn sinse noch beleidischd, weil de e sauweres Dascheduch zum abdriggl'n nimmschd, e halwa geweschennes heets fa unsaoana jo a gedun. Mä wän dumm, dabbisch und eigendlich iwwaflissisch, aussa als Konsument, awwa grad dort dun ma zu wennisch. Mä saufe zu wennisch, mä raache zu wennisch, mä kaafe net alle zwee Woche in Ferrari un fresse blouss sellem alididdl soin Fraß. Lenga schaffe meesde ma, va weni-scher Geld, owends, schdadd Fernseh zu gugge, mee Kinna mache, wu se brauche, weil se die Rende in Werwevadräg verschosse hewwe. Mit siewezisch nochemol Kinna mache, Bawett, ach Bawett, was duschd'n ma oa. Hei, Aldi, hei, wwas geit'n do? Mä keent devu laafe, woann ma doann wod.

## Schdännscha

Isch schein mich monschmol vor ma selwa. Imma woann de Himmel mol wie uffreist und owends die Schdännscha zu sehe sin, bin isch frou, dass se noch do sinn. Irgendwie hewwisch des Gefiehl, sie wään fort, woann ma se e Weil net sieht. Kinna heen se viellaischt weggewischt orra iwwamolt. S' kehnt aa soi, dass se oafach vablasst sin, weil se niemoand ufgrischt hot, orra dass die do Owwe die Schdromreschnung net bezahlt hewwe. Keent doch alles soi, orra? Uf jeden Fall warn se heit owend mol wie do. Isch sollt ma doch mol e paar Noame vun denne merke. Fa alle Fell, woann se mol nemme do wäärn un isch die Bolizei vaschdändische meesd. Alla donn.



## Zwelfe Middaags

Um Zwelfe Mittags hots oagfange. Heit Middag. Genau wie in sellem Film mit dem Dingsbums, un dere Ferschdin. Bei mä hots heit middag um zwelfe oagfoange. Im Zwelf hewwisch in Oama genumme und bin lous gedibld, als wia de lange Gong in de Fawarik entlong un heb Krogodilsdräne oagfonge zu soammln. Iwwa die Krongheit, wu die Gsundheitsreform dezu sache. Iwaa de Betriebsrad, wu no ja, Sie wisse schun, was ma sou sescht, wonn net, doann froche Se mol de Kall, driww vunn Geischdaboch, dä vazeilt Ihne was, bis se aa Dräne krije. Krogodilsdräne blouss, awwa do drum geits jo, s'net woar? Iwaa de Chef un soi Chefin und dem Kall soinera Cousine ää Fraa. Ja so was gibts jetzt aa bei uns. Zum Groine, orra? Was ma alles im Zwelfe sou alles hääd, was zum Groine wä. Moin Oama wa ruck-zuck voll un isch hebb'n ausgelääd in de grouse Dräne-Pool. Dodevo soamml isch jo. Lauda salzische Krogodilsdräne imme Pool. Do kenna ma doann im Summa drin schwimme, doann bei däre Kasselaache noch Majorga zu flieje, noa, wä soll doan des bezahle, 'sUrlaubsgeld hewwa ma schun fas Gebiss ausgewwe. Awwa sou groine ma uns aa e bissl Urlaub zoamme. Alla..

## Haisl

Monschmol hewwisch Sehnsucht noch dem Haisl iwwa de Mischdkaut. Sou oans miäme Herzl drin un zoammegschnidde-  
ne Zeirungsbledda als Klobabier. Do hot Disch koana gsucht,  
mä hot allemol die alde Zeidunge fragmentarisch lese kenne  
und sisch des abgschniddene Vaschnipsl vorstelle kenne. De  
Gschdong wa aa net schlimma , als dä wu die Fawwarike alle-  
weil produziarn. Awwa blous so im Friejhoar heed isch gään als  
sou e Sitzung. Jezad sou im Winda, des heww isch vadrängt,  
awwa moschmol fehlt ma des, wie in Rohdeländergoggl, vum  
Opa gschlachd und de Oma gebrode. Net gegrillt. Imma die  
Grillerei, is doch woahr. Jo, is jo gut. Alla doann.

## Zugeblaschdad

Mä is oigfalle, warum die Kinna koa Klicka mee schbiele, no net Murmeln, Murmeln waan zu daia, sou kloane farwische Klicka. Frieha hewwe ma halt uffm Trottwar e Loch gegräawe, wu die Klicka neugschnuggt woan sin. Isch froch eisch, äh Leid, wu solle um Goddes Wille Kinna heit Lescha graawe uhne vaklaagd zu wänn? Dodevu mol gonz abgesehn, wu keend man heit noch Lescha graawe? Is doch alles zubetoniert, geblaschdad, hart un zu. Mä hewwe noch uf de Schdroos Fussball gschbield und sind iwwa die Ägga gerennt, draus im Feld. Konn heid koa Kind meh mache. Un mä wunnan uns, dasse oaduand vo de Kischd hogge, mä wunnan uns iwwa unsa Kinna, wu doch alles zugeblaschdad is? Ach ja, zwee Golfpletz hewwe ma jetzad aa, Tennishalle un was was isch.

## Iwwasetza

Iwwasetzt doch all die dumme Schbrisch vun de Werwe-Tontes und de Bolidiga-Ungls un vo allem de Topmanager-Godfathers in eian Dialegd, wonn schunschd nix mee hilft. No, gell, is geil, hä? Heeda ned gedengt, do bleibd meischdens nix iwwarisch ausser däre haase Lufd und die is doch Klasse bei dem Werra, orrra? Gell, alla donn.

## Petze

Unnam Himml henge die Wolge als Netz, dass die Engelscha beim Schobbe petze net imma gonz enunna falle. Desdeweje gibts alleridd mol Reije un sou rischdisch geelgraue Wolge, sou digge, zornische. Das hald nix bassiert, soun in Engl is doch aa blous in Mensch un will mol oana petze orra? Alla, Leid, schennd net sou iwwa des "Grau in Grau", wie die Nordlichda imma sache, petzt halt oana mit de Engelscha, awwa uffbasse, net sou arg, do hunne gibts koan Himmel un koa Netz. Blous Wolge, drowwe oam Himml. Alla gut.

## Glinnan

Vohin bin isch geglinnad. Mim Hund war isch fodd. Im Dungle sin ma iwwa die Ägga gschdolwad un uf oamal wa do e groußi Klinnaboan un dann hewwisch vagesse, daß isch schon iwwa die Fuffzisch enaus bin. Faschd e Vädelschdunn mim Hund als wia die Glinnaboan endlong gerutscht un net uf die Fress gfalle, isch net. De Hund beinoah e paar mol, awaa Schbass hotsem gemachd un mä aa. Jezad deng isch, daß isch dabbisch waa, noch netemol e Handy hewwisch dabei ghadde. Isch wää dogeje wie in Maieffa uffm Buggl, awwa's hot sou in Schbass gemacht, älich. Woann isch ma's sou rischtisch iwwalegg, hewwisch schon long koa Kinna meh glinnan sehe. Noch sou ebbes, mä salze die Glinnaboane all weg, s'keend jo irgendoana klaache. Ma keent groine. Ach Gottsche was solls, die hewwe dodevo xboxe un 's Indanetz, alla donn.

## Summa is wire mol

Segflischa dreibe  
die Migge vum Himml  
krawwln zwische  
de Wolge erum  
koana hod  
rousa geschdrische  
heid

## Hoamwei

Monschmol  
hogg isch dehoam  
un hebb  
hoamwei  
un lach misch  
doann aus



## Roude Sogge

hod se ma gschdriggt  
mid goldene Schdreife drin  
un schwarze  
Drinne wennisch wäds  
lind in usara Nachd  
wonns laud wedd  
in de Schdubb

Wonn ma no  
jodln keende  
mä Pelza  
In Kur keend  
ma gehn

## Ach Du

Trauwe reife  
dass se weg  
sin aus moim  
Gsischd  
Bään wän ma  
liewa orra  
die Ebbl  
no ned die  
vum Boam

## **Alla hopp, Mehmet**

Wonn de Mehmet  
Alla donn sescht  
un Alla Hopp kreischt  
donn issa beim Schaffe  
un äh Dödl missdm  
koan Trojaner  
in de Moscheecomputa  
hetze  
äh hedds doch net all  
unsan Effendi, den Kümmel  
sou zu vaschregge  
Troja leigt doch  
in de Türkei  
direkt newa dem  
Kaff wu soi  
Schwimudda wohnt

## **Geglizza**

Die Sunn is ma in  
die Fieß gerolld  
un isch hebb se  
in de Negga geruggld  
s' sieht gud aus wonn se  
roud glizad

## Drinnedraus

Innewennisch  
donzd moi Radio  
als des Lied  
was isch da  
gschriwwe hebb  
wu de gegroind hoschd  
weil's so schee war.  
Un nix leefd  
ausewennisch  
de Rond elong

## Moannema Ferz

Monschmol droam  
isch de Negga deed dursch  
Vänne laafe un de Mozard  
heed sisch mim Schilla  
sellemols noch Vänne vaärrd  
un donn kimmd ma  
dass de Männagronz des donn  
dauand gesunge heed  
in de Schul meesde die Kinna  
des uffsaache, ausewennisch.  
Un de Negga deed aa noch in  
die Kella laaafe, bleib ma ford  
mit denne Monnema Ferz

## **Kääh, nix als kääh**

Somsdags Middags  
wonn se drauß  
uf de Gass de  
Schdaab vadreiwe  
drops isch liewa  
moin Schweiß  
uf doi Koppekisse  
moi Trottwar is sou  
roin sou roin  
roi un naus un  
roi un naus  
hewwe ma gekäähd  
roi un naus  
s'kähd hald dezu  
s'kähd gekähd,  
mä kähn ,mä kähn  
unnas Koppekisse

## Schdännscha

Schdännscha grawwln iwwa die Wolge  
greische laud wonn de Newwl  
zu arg aus de Peif raachd  
kitzln die Reiedrobbe  
bis se falle un  
isch ned gieße muss  
Uffm Friedhof  
geischdan die Sunne  
un peife se hoam  
die Schdennscha  
monschol fungld's  
noch in moine Aache



## **feischd**

moin kopp ruht schwä  
in doim schouss  
de mied lessd die finga ruhn  
uf doim kreiz  
sell knie grad iwwa doim  
die trobbe uf de stän  
laafe longsam  
de backe entlong  
in doi feischdi seel

## Die do owwe

Die Wichsa vun de Opposition  
die Roure vun de Schwarze  
allminnona oa geldgierischi Soß  
De Dabbes dovonne  
kennscht dem soi Fraa  
Dä Kinnaschreck do hinne  
wie soin Ungl, gugge mol do!  
Was isch ? Bei denne ? Wiesou isch?  
Daß ma's geit wie denne do unne?  
Gugg se doch oa!  
Waaaas, isch?  
Gugg misch doch oa.

## G'schichte aus'm Keffadala Wald

Geschdan wa iwwamoie noch soweit eweg  
un jetzt is vageschdan  
als wie wonn's geschdan wä  
un moie is noch fascht net do  
Un dieforsch Woch is Gschichde  
und die negscht noch Fiction  
un alleweil bin isch halt do  
un alleweil bin isch bei dä  
un awwl is jetzt  
un kumm hä,  
die Nacht noch long net vobei

## **Kinna, Kinna**

Variggdes Hingl iwwazwersch  
in Zwoggl vazwiggld  
gegiggld, gegaggld  
gezwingad, vazwiggd  
onne geloffffe gedischd gedaschd  
gebuggld vapienst  
on moingere Schulda  
Du vazwigglda Zwoggl  
giggld un gaggld  
Kumm halt hä un groin du Butz

## Somsdags Middags um Dreie

Rasemäha raddan  
Moi nasse Hoor glenze im Wind  
E Summa - Lied vun vogeschdan  
fladdad vun de Beem  
Isch nuggl on moim Kaffee  
loss moi Gedonge fliehe  
midde ins Gewidda dod driwwe hinna Lomberde  
Un donn blitzt's un kracht's unn e Dunnawedda  
Isch frier de Summa oi un bring dann mit hoam

## Summa

Disigner - Brotworscht  
Kannabis - Bier  
Senf aus Shanghai im Colani - Glas  
Holzkouhle aus Teak - Holz  
Giraffe Schteak vum 3 - Schternscha - Grilla  
un zum hunnadschte Mol no Satisfaction  
live uffere alde Les Paul  
Sunne - Scherm vun Lagerfeld  
un's Gras aus Wibeldon  
Summa, Kinna 'swerd Summa

## **sella schdern from us**

uf sellem schdern  
mit unsare numma  
where all the flowers growed,  
all the blue ones for your bodysoul  
uf sellem schdernsche  
wu isch dein noame geritzt  
the name I caught from your sun  
when it burned me for seconds of love  
uf dem schdern wu gliht  
seit dreihunnadmillionedausend joar  
where I pitchforked our names  
while venus claps her tango hand  
unna selle linde  
wu die schdernsche dagsiwwa glihn  
where you kissed my name in the neck  
startup with rockets, to the stars in my\_you heart  
uf sellem schdern beädischd misch  
awwa losst eisch zeid  
the times they are a'changing  
in the name of love and your's an' mine

## woann die Grabbe wia kreische

iwwa de abgeroamte Egga,  
werds schee kalt draus,  
un gemietlich warm dehoam.  
Doann kenne ma wia mol  
selle Sache mache,  
fa dies im Summa  
geschdern noch  
vieeel zu haas  
vieeel zu hass  
war  
woann die Grabbe wia kreische



## wädä uf die haut

isch hebb da alle wädä uf die haut gemolt  
isch hebb da alle sätz  
seit goethes schillerschul  
in de mund ennunna gezungt  
alle buchstawe hewwisch  
on disch droa geriww  
un sunscht alle via wädä gewischbert  
gonz leisl grawwelt e word uf disch druff  
un jetzt, un jetzadt hoschdas gfonge  
un enoi demit enoi  
am anfang war das wort  
un des wort is ins fleisch geworten  
isch hebb da wädä uf die haut gemolt  
sätze  
un goethes schillerschul

## **vadiefung**

unsa diefi lieb  
hewwisch e bissl ausgegrawe  
heischa gsetzt  
dass ma wia bessa  
vadiefe kenne  
dief, dief drin

## **image**

moi image war in de roinischung  
es iss in haufe oigonge  
jedazd muss isch grad wia  
goanzeloa misch selwa soi

## wieviel schdrosse

mä hewwe uns  
schdrosse gebaud  
iwwa die buggl eweg  
iwwa die schwelle  
sellene linie entlong  
schdrosse blouss fa uns  
dief in uns noi  
noi zu dä, vun mä zu dä  
un als wia gehn ma  
die schdrosse entlong  
and they called me a man  
nei getääd  
hewwischse  
unsa schdross  
jezad renne ma wia  
als die schdross entlong  
imma schnella  
imma heischa  
und londe gonz vabaasd  
in unsam bett  
nei getääd  
kääd se halt  
imma wia

## Training

Im Kella hewwisch  
e aldes Bild vun dä  
on die Woand genaggl  
un allweil woann isch  
Limo hol  
orra e Glas Schmäsl  
gugg isch da dief in die Aache  
Training is alles  
grad, woann ma elda wäd  
grad doann

## **Kersch**

Mä hewwe die Kersch im Dorf gelosst  
Jahre long  
Imma die Kersch im Dorf gelosst  
jezad hewwe ma koan Parre meh  
koana geid meh noi  
awwa die Kersch  
hewwe ma im Dorf gelosst  
die Kersch

## **wu zum deifl**

wu zum deifl sin blous all  
die peacezeiga gebliwwe  
genosse revoluzza  
wu zeim deifl sin blous all  
die peacezeiga gebliwwe  
isch deed se schunn mol wia all gään sehn  
ppa genosse revoluzzer

## im schubbe

hinnam quetscheboam  
im schubbe  
selbschd bei schnubbe  
hewwe ma  
uf schdännschnubbe gewaad  
im schubbe  
hinnam quetscheboam  
des waade waa long  
zu long fa uns zwaa  
im schubbe  
hinnam quetscheboam  
im schubbe  
scheiss uf den schnubbe  
hewwe ma  
schdännschnubbe selwa gemacht  
im schubbe  
hinnam quetscheboam



## im kaffeehaus

dischde die dischda  
wie net gonz dischd  
dischde  
un  
dischde  
dischdunge  
in de kaffeaudomad  
jezad  
geida wia  
e kaffeehaus brauchd hald  
dischda  
zum dischde un dischde  
wies hald sou kimmd

## hinna de wolge

hinna de wolge  
feian die schdenscha party  
donze  
dringe s'weltall lää  
schbridze mit antimaterie rum  
wonns pingld wie variggt  
geits hinna de wolge ab  
faian die schdenscha party  
alsemol wä isch aa gään  
e partyschdänsche  
hinna de wolge

## lideradurkombedenz

fa die lideradur  
braucht ma jetzt aa e  
kombedenz  
nix mee ofach sou lese  
un draud eisch blous net  
irgendwas zu schreiwe  
äschda die kombedenz  
e kombedenz muss bei  
isch loss ma oani schigge  
jeda valaag vakeefd oani jedzd  
mit allem drum un dro  
alles uf die hack  
fa die lideradur  
is ma  
nix  
zu daia  
waad no  
waad no  
woann moi komedenz kimmd  
woad no

## **aliens**

moi fraa schdriggd  
alleweil aliens  
die gonz vawondschaft hot schun oans  
aussa-erdische kumme ma awwa net ins haus  
kaaft liewa moinere fraa äh aliens  
älisch

## **gudi bessarung**

moi gudi bessarung  
is de abfluss enunna  
die deiere tabledde  
nochgebessad  
gelob isch bessarung  
vabesserunge hewwisch gemachd  
moi gudi bessarung  
hewwisch fa e peggl  
gudsoi  
vakaafd  
seid dem geid mas bessa  
uhne die gud bessarung

## marinierti seel

isch hebb moi herz  
in essisch oigelegd  
moi seel mariniert  
moi hänn mit kitsch iwwabagge  
awwa die hitparade vun de volxmussig  
konn isch imma noch net  
hään  
im pseudo dialekt mit hoimadsoss

## **isch hebb de himml geakaafd**

isch hebb de himml geakaafd  
un dabezieren nei  
isch heed jo was oanneres genumme  
awwa moin moann  
moin moann  
wolld wia schdenscha  
schdenschadabeed  
geeng oam beschde wia runna  
no ja  
die vorheng  
basse bessa dezu  
isch hebb ma de himml geakaafd  
nei dabeziad  
gfelt's aisch ?

## wahl

hedda eisch  
schunne mol iwwaleggd  
was bassiad  
woann sisch koana meh  
weehle losse will  
weil koana meh  
weehle geht



## **isch wä jo aa gään**

isch wää jo aa gään  
imme fischa-vaoin  
woann isch ned  
uf die woihnachtsfaia  
die fasnachtsdisco  
de joahresausflug  
un net beim summafesched  
bier zabbe meesd  
fisch fonge mit oannan  
deed isch isch jo gään

## **profis**

unsan vaoin  
wärd professionell gfiard  
grad bei de  
amadöre

## vagelst gott

seit de  
vagetstgott  
noch caritas tarif bezeehld  
un selbsch die muddamilsch  
oigeglagd wänn koann  
will koana meeh  
zweida vorsitzenda wänn

## **was sunscht ?**

woann jemon  
bürgerschaftliches engagement  
seschd  
willa da  
koa vasischerung vakaafe  
awwa was schunschd ?

## s' werd Herbschd

Doi Aache schdesche Lescha ins Blaue  
Doi Erm frian mid de ledschde Schdrahle  
dem Schdriggweschd entgeje  
Die naggische Fiess griwwln im Wind  
Doi Aache schdesche nemmee  
Die Fliggl vum Luftflieje vaschwinne im Hänn  
guggschd misch oa, bischd wia dehoam  
Doi Erm frian moim Gnigg entgeje  
Doi naggische Fiess grawwln moi Bee entlong.  
'S wäd Herbschd, Gott sei Dong.

## Zweidkopp

Isch hebb ma in Zweidkopp beschdelld.

Donn hewwisch zwee.

De Alde fa de hoam rum.

De Neie fas Gschehd.

Mid alle Fäz.

Mid vorprogammidam Vaschdoand.

Donn kann isch ma endlich in Kopp mache.

## Alle via Woche

hengda uffgeblöse dod owwe  
un valongd, dass isch romondisch wä.  
Wära in dere Gegend sou gewehnd.  
( Oam Negga un auserum )  
Isch knips Disch aus.  
Gei blous in die Haia, alda Mond.  
Un du aa, moin Nochba,  
donn klappds aa mid de Nochbarin.  
Alle 4 Woche des Theater....

## Hedd ä aa sou e EnglBloog ?

Als wia kumme se dursch's Fenschda noi  
un singe falsch.  
Des is aa nemme wasses mol waa.  
Isch hebb misch fa in Schutzengkors oagemeldt.  
Donn kumme se ma nemme roi.  
Schliesslich is unsa Dochda noch Jungfraa.  
Des bassiad ma ned, wie mid sellare Maria.  
Koan Mensch waas aa net, wi dere ä Mama kaase hot,  
orra ään Baba.  
Englscha, isch saach eisch, selli Engelscha



## Leischd un feddfrei

Leischd un feddfrei  
plädschan ma fo uns hi  
dufdisch leischd schwerelos  
scheiß uf's Geld moin Frisä is reich  
Schwä un schdreßvoll  
schaffe ma vo uns hi  
gnadenlos mit Power Cash-gewichtig  
Kumm riwwa mid de Flogge, moin Frisä is daia  
Cool un easy, skrupelfrei  
plädschan ma schwäfellisch fo uns hi  
dufdisch vaschwidzd, fa zu schwää empfunne  
de Sensemonn kreischd laud Midleif Crisis  
Leischd un fett frei  
plädschan ma fo uns hi  
dufdisch leischd, schwerelos  
scheiß uf's Geld , Scientology

## Äh Leid Äh Kinna

Isch glaab die mache aa  
äh Kinna durschs Telefon  
Fuckline Online  
blouß nix uhne Telefon  
Äh Leid Äh Kinna

## Was geischdisches braucht ma

Hedd äh eisch aa schunn in Geischd kaafd? Die Helga is mid ähm Dämon arg zufriede. Dem Peira soi Gschbendschda sin glei wie oigonge. Awwa jezad willas mool mit Engelscha probian. Mä breischd was geischdisches im Haus, seschd da. Mä wolle uns aa was zuleje. Awwa mä waade bisses beim Aldi wie billische Deiflscha gibt. Was geischdisches braucht ma im Haus, gell.

## **Vielleischt is die Weld unna goange,**

's seschd oam jo koana was  
unn isch hebb nix gemergd  
's wäd alle Joar schlimma  
's wäd alle Joar schlimma  
On sellem Millenium hot se jo  
unna gehen solle, die Weld un die Computa  
des hewwisch glatt wia vagesse  
s wäd alle Joar schlimma  
's wäd alle Joar schlimma  
Mä kimmt halt nirgends mee hie  
vielleischd isse jo aa schun unnagonge  
's mergd jo koana mee was  
s wäd alle Joar schlimma  
's wäd alle Joar schlimma

## Scheisstechnik

Sou in bleede Witz  
un isch hebb moin Lacha  
net debei  
Sou e foini Haut e foini  
un isch hebb moin Schdraischla  
valoon  
Sou e gudes Esse  
un isch hebb moin Vadaua  
vagesse  
Sou e scheenes Leewe  
un isch hebb moi Fraa  
vordgschiggd  
Scheisstechnik

## Redde den Schdondard - Dialeggd

speak German my Love  
babbl ned  
and a hip  
and a hopp  
alla donn  
moin schadz  
wu meschdn noch hi  
hi lovley, ciao bella  
gei isch noch mid  
cool bleiwe schedzl  
alla donn bis moie  
speak net moin schbadz,  
babbl net, liewa  
lieb misch, liewa, moin lover  
laaf hä

## Nix Neies

Leischda Reie iwwa Vänne  
Im Zentrum komma Boodsche faan  
Leischda Reie iwwa Vänne  
die Gondln faan aus de City  
uf de Kerschhouf  
Leischda Reie iwwa Vänne  
nix neies vun de Tonte Oanna  
imma noch zu, draus im Wald

## Liewa Godd, moin liewa

De liewe Gott hot misch gschdreischld  
De liewe Gott hot misch in de Arm genumme  
De liewe Gott hot misch lieb gedriggd  
De liewe Gott hot 's linge Aach zusoamme gepetzt  
De liewe Gott hot ma uf die Schulda geklobbd  
De liewe Gott hot ma durschs Hoar gschdrische  
un gsaad  
Koa engschd moin Bu,  
Sei ruisch moi Meedsche  
Misch gibds doch gaa ned, moi Kind



## Losst uns Kathedrale kaafe

Mä kaafe uns e Kathedral uf Raade  
in Houchalda uf Bumb  
Alta-Gscherr suchema uffm Schbämill  
aus alde Dischdegge nee ma die Foane zusoamme  
Wä des net herrlich,  
sou e Kathedral fa uns zwaa,  
Romanisch moi Liewie, barock moin Liewa  
alles uf die Hack, do guggschde gell !

## Haud aus Dräne

Du hosch doi Haud aus Träne oa  
Salz griwwld uf moin Bagge  
Alles on dä schmeggd salzisch  
Isch kumm net dorsch zu dä  
Doi Haud aus Träne driggld  
on moinere Schulda aus  
Salz riescht vun doim Hoar in Moins enoi  
Moi Haud schmilzd longsom doi Haud aus Träne aus  
mischd sisch mit doinere aus Träne  
Moi Haud un doi Haud  
schdraischln die valszde Träne weg  
Unsa Haud aus Schweiss hilld uns oi  
nix is mee wischdisch  
ko Träne koa nix  
blous noch unsa Haud aus Salz

## **Fusionian**

Kumm mä gehen hoam fusionian  
Fusionia mit mä  
Ach mach doch endlich  
All fusionian se  
kumm mä zwaa aa  
'zomme sin ma schdarg  
'zomme wachse ma un wän mee  
Kumm mä fusionian  
Medsche kumm fusionian

## Touristefluch

Tourist solschde soi in doinere Hoimadschdadt  
(Kinna im Preis oft mit inbegriffe)  
Uf ewisch in Halbpension  
Abgegriffe, abkassiert, Hoimadowendkaschdriad.  
Tourischd solschde soi, wu de aa bischd  
Selbschd oam Brunne vor sellem Doar  
Uf ewisch in Halbpension  
Du Herzilein, moin Schonschde is roin.

## Die Zeid is ford geloffe

Die Zeid is wia mol oam fordgeloffe  
die Zeid hot's wia zerigg gebrochd  
Was hot dä sisch g'fraad  
Was hot dä  
jezad hota wia Zeit  
fa Werwung zu gugge  
Jezad leefd'sem nemme defu

## Die Dummschwetza gehn um

Dummschwetza, dumma  
Dum, Dum Dumm  
die Labahaffe gehen um  
Dummschwetza, du Dummer  
Bum, Bum, Bum  
die Talker, talke Schwetza  
die Schwetza gehen um  
vaschdeggld aia Kinna  
schbädd die Schwiamidda oi  
die Dummschwetza gehen um  
schlaafe jeden ins Studio enoi  
dumm, dumm, dumm  
die Dummschwetza gehen um  
äh Gedda vun de Ufa un soin Diena Bohl  
erlest uns vun sellem Iwl

## **schweewe, schatz schweewe**

schweewe, schatz schweewe  
moin kopp is schwää  
moi seel ruht in dä  
alles ruht alles ruht in dä  
doin kopp is schwää,  
doi seel ruht in mä  
alles ruht alles ruht in mä  
schwinnlleischd moin kopp  
schwinnlleischd moi seel  
alles schwebt alles schwebt in mä  
moi seel ruht im kopp  
doin kopp ruht in möinere seel  
alles ruht schwebt schwebt in de moied devu  
schwebt in de moied devu

## Im Leewe net

seschd ma  
awwa wu  
donn  
schundsched